

大明會典

大明會典卷之一百三

禮部六十一

曆日

國家治曆明時以

賜百官頒行天下。屬欽天監官推算而事隸於祠部。每歲二月朔。欽天監奏進明年曆式。預行各布政司刊布。例以九月朔進呈頒

賜。嘉靖十九年改用十月朔

洪武二十六年定進頒曆日儀

前期一日。尚寶設

御座于奉天殿

今為皇極殿

教坊司設中和樂于殿內。其

日陳設如常儀。儀禮司設

御曆案于殿中。設曆案于

丹陛中道。設百官曆案于

丹陛下。鼓初嚴。引禮引文武官進曆官入階。侍立

位。鼓三嚴。執事文武官詣

華蓋殿。

今為中極殿

行五拜三叩頭禮。畢。傳

制。受曆侍從等官各就位。

皇帝服皮弁服出。樂作。陞座。捲簾。樂止。鳴鞭訖。引禮

引進曆官就位。贊禮唱鞠躬。樂作。贊四拜。平身。

樂止。典儀唱進曆。引禮引進曆官由東階陞詣

丹陛案前贊跪播笏取曆由殿東門靠東入至殿中。內贊唱跪。外贊唱衆官皆跪。唱進曆。監官以曆置于案。內贊唱出笏俯伏興。外贊亦唱俯伏興。平身。內贊唱復位。引禮引進曆官由百官門出。樂作。引至拜位。樂止。贊禮唱鞠躬。樂作。四拜。平身。樂止。進曆官退。執事舉百官曆案于丹墀中道。鳴贊唱排班。班齊鞠躬。樂作。贊四拜。平身。樂止。傳制官詣

御前跪奏傳

制。俯伏興。由殿東門靠東出至

丹陛東西向立稱有

制贊禮唱跪衆官皆跪宣

制曰欽天監進某年大統曆其賜百官頒行天下。
贊禮唱俯伏興樂作贊四拜平身唱頒曆頒曆
官取曆散于百官散畢。

駕興百官以次出

東宮進曆儀

欽天監官捧曆於

左順門候

奉天殿禮畢由

文華殿左門入於殿東門外西向立候陞座。鴻臚官贊四拜導引欽天監正官陞至。

文華殿外搢笏捧曆由東門入至殿中贊跪贊進曆監正官啓欽天監進某年大統曆落訖置于案出笏俯伏興仍導引出至拜位贊四拜興退立侍班候百官排班行禮畢嘉靖十八年後俱欽天監官捧至。

文華殿左門司禮監官捧進不行禮。

凡頒行曆日洪武十三年令。

諸王及在京文武百官直隸府州俱欽天監印造。

頒給十二布政司則欽天監預以曆本及印分授之使刊印以授府縣頒之民間○嘉靖七年令各布政司查照遞年解京曆數量將四分之二解赴禮部內將一分送各衙門分散官吏一分發順天府及各衛分散軍民其所減二分盡發各府州縣頒給小民

行典

祖宗克謹天戒後祥瑞而先災異洪武元年。

勅天下有司但遇災異具實奏聞二年令災異即奏無論大小四年又今天下勿奏祥瑞二十六

年遂著為令。凡各處獻來祥瑞，禮部准其事收
下。如有非時災異，即時奏聞。若遇日月交蝕，預
行諸司救護。

洪武二十六年定日食救護儀

前期結綵于禮部儀門及正堂，設香案于露臺
上，向日。設金鼓於儀門內兩傍，設樂人于露臺
下。設各官拜位于露臺上下，俱向日立。至期，欽
天監官報曰：「初食。」百官具朝服，典儀唱班齊，贊
禮唱鞠躬。樂作，四拜興，平身，樂止。跪，執事捧鼓
詣班首前，班首擊鼓三聲，眾鼓齊鳴。候欽天監

官報復圓。贊禮唱鞠躬。樂作。四拜。平身。樂止。禮畢。

月食儀同前。但百官青衣角帶。于中軍都督府救護。

凡日月食。洪武六年奏定。若遇雨雪雲翳。則免行禮。○永樂十一年正旦日食。罷朝賀燕會禮。○隆慶六年。

大喪方成服。遇日食。百官先行哭臨。後赴禮部。青素衣黑角帶。向日行四拜禮。不用鼓樂。○萬曆四年題准。月食救護。遇日出之刻。即止。不待復圓。

凡祈禱雨雪及晴禮部題請行順天府率所屬人員於都城隍等廟行香禁屠宰三日百官就各衙門致齋青衣角帶辦事

凡各處雨澤有無乾溢霑足俱要依期備細造冊申報禮部查考

凡一切祥瑞應稱賀者正統四年

勅諭止行在京衙門不必行移各

王府在外文武官及土官衙門

凡各處地震山川異常雨暘愆期等項奏到禮部案候年終類奏通行在京大小衙門及南京

禮部并各被災地方一體修省。或有異常災變不在類奏之例者。即行具題。一應祭告寬恤修省事宜。照災輕重議擬上請候

旨施行

凡民間一產三男。令有司給米養贍

大明會典卷之一百三

大明會典卷之一百四

禮部六十二



洪武二十六年著令凡天文地理醫藥卜筮師巫音樂等項藝術之人。禮部務要備知。以憑取用。在外行術占卜之人。聽於本鄉。不許越境興造妖妄等事。

凡卜筮者舊有禁。惟瞽目卜筮及陰陽人憑此生理許開卦肆。

凡天文生醫生有缺者儘世業代補外仍行天下訪取到目天文生醫同欽天監堂上官醫生

督同太醫院堂上官各考驗收用○弘治十一年令訪取世業原籍子孫并山林隱逸之士及致仕退閒等項官吏生儒軍民人等有能精通天文曆數陰陽地理及五星子平遁甲大定六壬龜卜等術者每府不過一二。試中收用

凡欽天監太醫院各官陞遷俱從禮部查明考選定擬職事咨送吏部銓註該監天文生陰陽人該院醫士醫生俱三年一次大考

凡欽天監官告太醫院官醫士生冊籍每三年一次各清查造報如有冒增隱漏等弊將承行

官吏及造冊人等叅治。該院官醫士生有離任回籍者俱赴部告明給牒定限。如私逃及違限徑行除籍。

凡各府州縣舉到陰陽人堪任正術等官醫士堪任正科等官者俱從禮部勘明陰陽人劄付欽天監醫士劄付太醫院。仍委司官會同各堂上官考試。考中者咨送吏部銓選。不中者發回原籍為底。原保官吏治罪。今俱納校不考徑咨

僧道

釋道二教自漢唐以來通於民俗難以盡廢。惟

嚴其禁約。毋使滋蔓。今甲具在。最為詳密云。

凡僧道給度。洪武五年。令給僧道度牒。罷免丁錢。僧錄道錄司。達周知冊。頒行天下寺觀。凡遇僧道。即與對冊。其父兄貫籍告度日月。如有不同。即為偽冒。○二十六年。令各司每三年考試。能通經典者。申送到部。具奏出給度牒。○永樂元年。令三年一給度牒。○宣德元年。以僧道行童請給度牒甚多。

諭禮部。先令僧道官取勘。禮部同翰林院官。禮科給事中及僧道官考試。能通經典。方准給與。○

正統十四年令僧道應給度牒者各僧道衙門
先行勘試申送有司審係額內并貫籍明白仍
試精通經典方許申送禮部覆試中式然後具
奏請給○景泰六年令僧道務要持行修潔本
戶丁多不係軍匠鹽竈等籍里老保結呈縣覆
實具申府司類呈該部方許收度仍勘各寺觀
原定額數如已數多不與出給○嘉靖十八年
奏准僧道照

國初額設定數每僧道一名納銀十兩在內於兩
京工部在外於各布政司直隸於各府上納類

解免其赴京。其兩京給度在京准二千名。南京一千名。○三十三年題准。各府州縣納解。年終造冊連庫收繳。送戶部給與號紙一張。咨送禮部填給度牒。○三十七年議准。每名量減銀四兩。○隆慶六年題准。禮部印發空頭度牒通行各處召納。如有未京請給者。赴戶部納銀五兩發號紙送禮部給牒。

凡僧道禁例。洪武二十年令。民年二十以上者不許為僧。○二十四年令。佛經番譯已定者。不許增減辭語。道士設醮亦不許拜奏青詞。各遵

頒降科儀。民有效瑜珈教。稱為善友。假張真人
名私造符籙者。皆治以重罪。○二十七年。令榜
示天下寺觀。凡歸併大寺。設碁基道人一人。以
主差稅。每大觀道士編成班次。每班一年高者
率領。餘僧道俱不許奔走于外。及交構有司。以
書冊稱為題疏。強求人財。其一二。人於崇山深
谷修禪。及學全真者。聽三四人。不許。毋得私創
庵堂。若遊方問道。必自備路費。毋索取于民。所
至僧寺。必揭周知冊。驗實不同者。拏送有司。僧
道有妻妾者。許諸人趕逐。相容隱者罪之。願還

俗者聽亦不許收民間兒童為僧違者并兒童
父母皆坐以罪年二十以下願為僧者亦須父
母具告有司具奏方許三年後赴京考試通經
典者始給度牒不通者杖為民有稱白蓮靈寶
火居及僧道不務祖風妄為議論沮今者皆治
重罪○二十八年奏准天下僧道赴京考試不
通經典者黜還俗年六十以上者免試○永樂
六年令軍民子弟僮奴自削髮為僧者并其父
兄送京師發五臺山做工畢日就北京為民種
田及廬龍牧馬寺主僧擅容留者亦發北京為

民種田○十年

諭禮部天下僧道多不守戒律。民間修齋誦經動輒較利厚薄。又無誠心。甚至飲酒食肉遊蕩荒淫。畧無顧忌。又有無知愚民妄稱道人。一槩盡惑男女雜處無別。敗壞風化。洪武中僧道不務祖風。及俗人行瑜珈法稱火居道士者俱有嚴禁。即揭榜申明違者殺不赦。○十六年定天下僧道府不過四十人。州不過三十人。縣不過二十人。限年十四以上。二十以下。父母皆允。方許陳告。有司行鄰里勘保無謬。然後得投寺觀從

師受業。五年後諸經習熟。然後赴僧道錄司考試。果諳經典。始立法名。給與度牒。不通者罷還為民。若童子與父母不願。及有祖父母父母無他子孫侍養者。皆不許。有年三四十以上。先曾出家而還俗。及亡命黥刺。亦不許。寺觀住持容留違者罪之。○宣德八年。令天下有司關津。但遇削髮之人。捕送原籍治罪如律。○十年。禁僧道私自簪剃。及妄言惑眾者。○正統六年。令僧道多有壞亂心術。不務祖風。混同世俗。傷壞風化。都察院即遵洪武舊例。出榜禁約。違者罪之。

○天順八年令各處僧人年二十以上無度牒者即便還俗有隱瞞年歲者并其師治罪○成化二十三年令僧道有父母見存無人侍養者不問有無度牒許令還俗養親○嘉靖八年奏准凡官戚施捨寺觀不許容令婦女出入及多蓄行童若有私自簪剃并犯姦者各照律例問擬

凡清理寺觀洪武二十四年令清理釋道二教凡各府州縣寺觀但存寬大可容衆者一所併居之不許雜處於外違者治以重罪親故相隱

者流願還俗者聽○又今天下僧道有創立庵堂寺觀非舊額者悉毀之○三十五年令清理釋道二教凡歷代以來及洪武十五年以前寺觀有名額者不必歸併新創者歸併如舊○永樂十五年禁僧尼私創庵院○正統六年令新創寺觀曾有

賜額者聽其居住今後再不許私自創建○成化十三年禁約遊方僧人凡僧道住持

創建寺觀許二人。

勅賜并在外寺觀各止許一人○正德十六年奏

准今後再有私剃庵院寺觀私度僧道尼姑女
冠者拏問治罪寺觀拆毀入官○嘉靖六年奏
准尼僧道姑發還原籍出嫁其庵寺房屋土地
盡數入官○十四年大興隆寺毀令永不許復
併大慈恩寺一應修齋俱革僧徒聽告就各寺
依住有歸化者量給原寺田畝仍免差徭六年
○十六年題准各該有司欽遵

聖諭化正僧徒願自還俗者聽其自求安便各處寺
院年久官殿任其頽壞不許修葺民間幼童不
許捨入為僧私自披剃如有此等罪其父母及

其鄰佑○二十二年令毀大慈恩寺○萬曆元年令五城御史查各寺觀庵院有遊食僧道驅令回籍仍比照居民保甲法置立油牌開闢年貌籍貫以便稽查其有私自髻剃及不穿戴本等冠服者訪拏治罪

凡禁止戒壇嘉靖四十五年令在外行撫按衙門督率有司各查本處僧寺若干僧徒若干明白登簿不時查點不到者罪坐住持立限投銷一切寄住遊僧發回原籍當差在京廠衛衙門及五城御史將京城內外地方大小僧寺嚴加

巡緝有指稱受戒姦淫不法者訪拏重治○萬曆元年。

詔禁革萬壽廣善二壇僧人戒法

凡保舉僧道洪武二十六年令各布政司并直隸府州縣申呈開設僧道衙門係縣到僧人割付僧錄司道士割付道錄司考試。如果中式就申吏部施行

凡僧道罪犯弘治七年令僧道尼姑女冠有犯姦淫者就於本寺門首枷號一箇月滿日發落○十三年奏准僧道官僧人道士有犯挾妓飲

酒者俱問發原籍為民。若姦拜認義父母親屬俱發邊衛充軍。○凡僧道額外擅收徒弟者問發口外為民。住持還俗僧道官知而不舉者罷職。○凡漢人出家習學指教不拘軍民曾否開給度牒俱問發原籍各該軍衛有司當差。若漢人冒作番人發邊衛充軍。

凡尼姑女冠。洪武六年令民家女子年未及四十者不許為尼姑女冠。

凡真人名號。洪武中華前代所稱天師。止稱正一真人。○隆慶二年題准。革正一真人名號。勒

令繳納真人府印止許承襲上清觀提點○萬曆五年仍准復真人名號

凡道士差遣萬曆四年題准道士差往

各陵寢祭告者止穿本等服色不許假稱太常寺官擅乘轎輿及香帛木匣之外多用人夫致擾驛遞

教坊司承應樂舞

朝會宴享等禮各有承應樂舞以教坊隸祠司故具列焉而樂戶禁例附

教坊司額設奉鑾一員左右韶舞二員左右司

樂二員共五員遇缺以次遞補。又有協同官十

員實授俳長四名。

隆慶六年以添協同官五員。

東宮出閣。協

同俳長辦事色長十二名及抄案執燈色長等

亦以次遞補

凡

聖節冬至正旦行朝賀禮上

徽號進

實錄冊封頒

詔進春進曆遣祭

郊祀聽受誓戒進士傳臚及進士上表俱用中和詔

樂兼用堂下樂

中和韶樂設于

奉天殿內先一日于

御前奏知如再用即奏云安定不動計用舉麾奉鑾
一員侍班韶舞一員看節次色長二人歌工十
二人樂工七十二人

凡朔望并歲首半月太常寺奏祭祀陞殿俱用
堂下樂

凡大祀

天地尊

太廟祭

社稷神祇耕藉田。幸太學導

駕俱用堂下樂

堂下樂設于

奉天門北簷下。計用領樂韶舞等官三員。俳長二

人。色長十二人。歌工十二人。樂工一百三人。

凡大祀慶成。

聖節冬至正旦大宴俱用丹陛樂侑食樂

丹陛樂設于

奉天殿前丹陛上。計用領樂俳長二人。色長四人。

歌工十二人。樂工一百八人。

侑食樂設于

奉天殿內。計用唱盛奏樂奉饗等官五員。領樂色長四人。歌工四人。樂工三十一人。

凡禮部進表箋及迎

詔俱用大樂

大樂提調色長一人

凡大祀

天地導

駕回。

園丘出南天門。

方澤出北天門。錦衣衛官奏起顰色。長一人唱作樂。
奉鑾一員唱樂奏神歡之曲。樂作。導至
奉天門。樂止。

駕至奉天門堂下樂作。

駕至奉天殿樂止。

上易服。鴻臚寺官奏請陞殿。色長唱作樂。奉鑾舉麾
唱樂奏聖安之曲。中和韶樂作。

上陞座。樂止。鳴鞭致詞。俟贊禮堂下樂作。禮畢。樂止。
贊禮畢。奉鑾舉麾唱樂奏定安之曲。中和韶樂

作。

駕興還至

華蓋殿樂止。計用領樂官五員。俳優長四人。協同俳優長辦事。色長十二人。各色色長八十四人。樂工十八撥。第一撥一百八人。第二撥至十八撥。每撥不等。大約二三十人。歌工每撥十二人。

凡

太廟時享導

駕回。

上祭畢至

廟街門內陞輦錦衣衛官奏起輦。俳長唱作樂官一員奏樂奏敬祖宗之曲。導至

午門裏樂止。計用領樂官五員。俳長十人。各色色長四十人。樂工四撥。每撥一百八人。歌工十二人。

凡祭

社稷導

駕回。

上祭畢至

社稷門內陞輦。錦衣衛官奏起輦。俳長唱作樂官一

員奏樂奏神歡之曲導至

午門裏樂止計用領樂官五員。俳長四人。各色色長十六人。樂工二撥。每撥一百二人。歌工十二人。

凡祭

山川導

駕回。

上祭畢陞輦錦衣衛官奏起輦色長唱作樂官一員奏樂奏神歡之曲導至

奉天門樂止計用樂工十八撥樂章樂器并用人

數與

郊祀回同

凡幸太學導

駕回。

上幸太學禮畢。陞輦錦衣衛官奏起輦。色長唱作樂官一員跪奏樂奏神歡之曲。導至

奉天門。樂止。

上陞座樂作。坐定。樂止。百官行禮。樂作。禮畢。樂止。

駕還宮樂作。至

奉天殿樂止。計用樂工八撥。樂章樂器并用人數。

與

郊祀回同

凡耕藉田導

駕回祭

先農畢至藉田所戶部尚書捧鞭跪進本司官引
裝扮裏行十八人內村田樂老人四人禾侏十
四人各念禾詞外行七十二人各作樂器攏撥
隨

駕行三推禮畢。

駕至儀門。

嘉靖十年後陞座樂止觀三公九卿耕

訖。本司承應用太樂攬掇百戲院本探子勦斗

隊舞畢。

嘉靖十年更定。攬掇百戲俱于宴時承應。

本司官跪贊致語。

駕至殿內陞座。進湯進膳。俱用樂。順天府官并耆

老人等行禮謝。

恩樂作。禮畢。樂止。次百官行禮樂作。禮畢。樂止。

賜百官酒飯。復入班行禮樂作。禮畢。樂止。尚膳官

進膳。樂作。進訖。樂止。百官入席。本司官奏一奏。

本太初之曲。進酒。樂作。進訖。樂止。進膳。樂作。進

訖。樂止。本司官跪奏進湯。樂作。徹湯。樂止。二奏。

仰大明之曲。進酒。進膳。進湯。樂作。進訖。樂止。皆

如前。三奏民初生之曲。進酒進膳進湯樂作。進
訖樂止。復皆如前。徹。

御案畢樂止。百官行禮樂作。禮畢樂止。鴻臚寺官奏
禮畢。

駕起陞輦。仍用十八撥樂工歌工前導。起輦色長
唱作樂。本司官跪奏樂奏神歡之曲。導至
午門前樂止。

凡大宴

駕出至奉天門。色長唱作樂。

丹陛樂作。

駕陞奉天殿樂作。鴻臚寺贊百官四拜禮畢樂止。
光祿寺進

御筵樂作。內官設茶訖樂止。進花。進膳樂作。進訖樂
止。奉饗奏一奏上萬壽之曲。侑食樂作。斟酒贊
跪。本司官奏進酒樂止。各官就坐奏樂奏平定
天下之舞。引舞樂工二人。舞人樂工三十二人。
舞畢奏二奏仰天恩之曲。侑食樂作。奏進酒樂
止。殿外導湯樂作。領樂俳長一人。色長四人。攔
節樂工二十四人。殿內迎湯樂作。領樂色長二
人。歌工四人。湯至奏進湯樂作。贊饌成徹湯樂

止。奏黃童白叟鼓腹謳歌承應舞。念禾詞俳長

一人。歌工四人。樂工十五人。白叟六人。黃童八

人。舞畢。奏樂奏撫安四夷之舞。引舞樂工二人。

歌工四人。樂工十七人。高麗舞。琉球舞。北番舞。

回回舞。各四人。舞畢。奏三奏感帝德之曲。今欽

吳德侑食樂作。奏進酒。樂止。奏樂奏車書會同

之舞。舞人樂工三十四人。舞畢。奏四奏民樂生

之曲。侑食樂作。奏進酒。樂止。導湯樂作。迎湯樂

作如前。奏進湯。樂作。贊饌成。徹湯。樂止。奏樂奏

表正萬邦之舞。引舞樂工二人。舞人樂工六十

四人舞畢。五奏感皇恩之曲。侑食樂作。奏進酒。
樂止。導湯樂作。迎湯樂作如前。奏進膳。樂作。徹
湯膳并。

御筵樂止。奏樂奏天命有德之舞。引舞二人。舞人樂
工六十四人。舞畢。奏纓鞭得勝蠻夷隊舞。舞人
樂工一百四人。承應內獅子舞五人。舞畢。官二
員更迭致語萬民安樂。天下太平。嵩呼萬歲。再
動樂聲。樂作。樂止。百官四拜。禮畢。
凡進士傳臚。

上將陞殿。色長唱作樂。官一員舉麾。奏樂奏聖安之。

曲中和韶樂作。

上陞座樂止。舉人行禮堂下樂作。禮畢樂止。傳

制黃榜案起樂作。至丹墀置定樂止。傳臚舉人行
禮樂作。禮畢樂止。案起樂作。案至

奉天門外樂止。大樂迎黃榜出。鴻臚寺官致詞百
官行賀禮樂作。禮畢樂止。本司官舉麾奏樂奏
定安之曲。中和韶樂作。

駕還宮至

華蓋殿樂止

凡進士上表謝

思。

上將陞殿。色長唱作樂。官一員舉麾奏樂。奏聖安之曲。中和韶樂作。

上陞座。樂止。鴻臚寺官贊百官行常朝禮。樂作。禮畢。樂止。諸進士行禮。樂作。禮畢。樂止。進表。表案起。堂下樂作。安置定樂止。宣表畢。進士行禮。俯伏。樂作。禮畢。樂止。進士行四拜禮。樂作。禮畢。樂止。本司官舉麾奏樂。奏定安之曲。中和韶樂作。

駕還宮至。

華蓋殿樂止。

凡慶賀

東宮千秋節并朔望朝參領樂官五員。俳優長二人。歌工四人。樂工四十人。

凡

東宮冠禮畢宴用七奏樂。領樂官四員。俳優長二人。色長四人。歌章拍板樂工四人。樂工十人。

凡慶賀

皇太后聖節女樂奉鑾等官妻五人。提調女樂四人。歌章二十四人。奏樂一百一十五人。

凡慶賀

中宮女樂同

凡每日常朝樂工二十人于

午門外

御道兩旁侍立

凡

諸王公主婚嫁本司用大樂前導

凡進

實錄并纂修書籍成

賜宴禮部俱本司承應

凡進士傳臚後例於禮部設宴武舉開榜後例

於兵部開宴俱本司承應

凡四夷人朝貢到京例于會同館設宴本司承應

凡供應樂器遇有毀壞本司申禮部題請咨工部造辦其絃線等料南京教坊司三年一解南京禮部咨禮部驗給

凡御樂庫看庫人役三年一次僉補每年六月六日曬晾在庫袍服

凡樂戶禁例本司官併色長諳曉其藝于某年月日補充某役俱造文冊備照如遇官併色長

有缺皆以次選補。但係為事革役間注者。再不得補充。其本司老疾不堪承應之人。放回原籍為民。一體當差。○洪武永樂間。令各衙門人指稱本司樂戶寄附贓物。法司不得追取。○景泰七年議准。凡良家女子。本司不許買作倡優犯者。問擬如律。子女發回寧家。仍查原係民戶。今為樂戶。許令改正。其樂戶內有願從良者。聽其自首與民一體當差。○弘治九年議准。樂戶家不許容留盜賊。及不知來歷之人。事發官俳優長俱治罪。○又令私買私賣良家子女及媒合

人等俱於三院門首枷號一箇月。滿日照依律例發落。該管色長并鄰佑人等不肯告者與同罪。官俳查提從重問擬。南京及各王府同○十三年奏准。教坊司官俳精選樂工演習聽用。若樂工投託勢要。挾制官俳及抗拒不服拘喚者。聽申禮部送問。就於本司門首枷號一箇月發落。若官俳徇私聽囑放富差貧縱容逃躲者。叅究治罪革去職役。

大明會典卷之一百四

大明會典卷之一百五

禮部六十三

主客清吏司

郎中員外郎主事分掌諸蕃朝貢接待給賜之事。簡其譯伴。明其禁令。凡百官恩賚各省土貢亦隸焉。

朝貢

國初諸蕃國及四夷土官朝貢。真載職掌。其後慕化者衆。事例日增。土官衙門添設。別見兵部。而事關朝貢者。附此。

東南夷土

通

祖訓及職掌凡二十

祖訓列不征諸夷朝鮮日本大小琉球安南具臘暹羅占城蘇門答刺西洋爪哇彭亨百花三佛齋淳泥凡十五國職掌所載又有瑣里西洋瑣里覽邦淡巴須文達那諸國與

祖訓稍有不同洪武初分遣使臣奉

詔往諭諸番以平定四海之意多隨便來朝貢者八年。

諭安南高麗占城等國每三年一朝貢國王嗣立則世見永樂中數有事于西洋遣中使以舟師三萬齎金帛

諭賜之。隨使朝貢者十有六。

朝鮮國

祖訓。朝鮮國即高麗。其李仁人及子李成桂。今名旦者。自洪武六年。至洪武二十八年。首尾凡弒王氏四王。姑待之。於高麗。併有扶餘。新羅。百濟。其國分八道。洪武二年。國王王顯遣使奉表賀即位。請封貢方物。

詔封為高麗國王。

賜龜鈕金印。誥命。五年。以高麗貢使煩數。

諭令三歲或歲一來。二十五年。李成桂代王氏請。

更其國號。

詔更號朝鮮。永樂初

賜印誥。自後每歲

聖節正旦。

嘉靖十年。外夷朝正旦者。俱改冬至。

皇太子千秋節。皆遣使奉表朝賀。貢方物。其餘慶
慰謝。

恩無常期。若

朝廷有大事。則遣使頒

詔於其國國王。請封。亦遣使行禮。其歲時朝貢視
諸國最為恭慎。嘉靖二十六年。特許其使臣同

書狀官及從人二三名於

郊壇及國子監游觀禮部劄委通事一員伴行撥館夫防護以示優異云貢道由鴨綠江歷遼陽廣寧入山海關達京師又中國漂流人口至本國者量給衣糧送回先是永樂元年其國王具奏世系不係李仁人之後以辯明

祖訓所載弑逆事。

詔許改正正德嘉靖中屢以為請皆

賜勅獎諭焉萬曆三年使臣復申前請。

詔付史館編輯今錄于後

李成桂系出本國全州。建祖翰。仕新羅為司空。六代孫兢休。入高麗。十三代孫安社。生行里。行里生椿。椿生子春。是為成桂之父。李仁人者。京山府吏長庚裔也。始王氏恭愍王。顯無子。養寵臣辛旽子。禍為子。恭愍王為嬖臣洪倫等所弑。李仁人當國。誅倫等。立禍。禍嗣位十六年。遣將入犯遼東。成桂為副將。在遣中。至鴨綠江。與諸將合謀。回兵。禍懼。傳位于其子昌。時恭愍妃安氏以國人黜昌。立王氏孫定昌君瑤。誅禍昌。逐仁人。已而瑤妄殺戮國人。不附。共推成桂署國。

事表聞。

高皇帝命為國王。遂更名旦。瞻瑤別邸終其身。

貢物

金銀器皿

螺鈿梳函

白綿紬

各色苧布

龍文簾席

各色細花席

豹皮

獺皮

黃毛筆

白綿紙

人參

種馬每三年五十四匹

近有加貢。不在禮聘之數。

日本國

祖訓日本國雖朝貢詐暗通奸臣胡惟庸謀為不軌故絕之。按日本古倭奴國。世以王為姓。其國有五畿七道及屬國百餘。時寇海上。洪武五年始令浙江福建造海舟防倭。七年其國王良懷遣僧朝貢。以無表文却之。其臣亦遣僧貢馬及茶布刀扇等物。以其私貢却之。又以頻年為寇。令中書省移文詰責。自後屢却其貢。并安置所遣僧于川陝番寺。十四年從其請遣還。十六年築登萊至浙並海五十九城。二十年築福建並海

十六城各置衛所永樂初復來朝貢。

賜龜鈕金印誥命封為日本國王名其國鎮山曰
壽安鎮國之山。

御製碑文賜之給勘合百道始今十年一貢貢道由
浙江寧波府每貢正副使等毋過二百人若貢
非期人船踰數夾帶刀鎗並以寇論宣德初遣
貢不如約。

諭使臣自今貢毋過三船人毋過三百刀劍毋過
三十嘉靖六年奏准凡貢非期及人過百船過
三多挾兵器皆阻回二十九年定日本貢船每

船水夫七十名。三船共計水夫二百一十名。正副使二員。居坐六員。土官五員。從僧七員。從商不過六十人。三十年後時入寇掠。自是朝貢未有至者。

貢物

馬

盔

鎧

劍

腰刀

鎗

塗金裝綵屏風

灑金廚子

灑金文臺

灑金手箱

描金粉匣

描金筆匣

抹金銅提鈔

灑金木鈔角盞

貼金扇

瑪瑙

水晶數珠

硫黃

蘇木

牛皮

琉球國

祖訓。大琉球國朝貢不時。王子及陪臣之子皆入太學讀書。禮待甚厚。小琉球國不通往來。不曾朝貢。按琉球國有三王。洪武初。中山王察度。山南王承察度。山北王帕尼芝。皆遣使奉表箋貢馬。

及方物。十六年各

賜鍍金銀印。二十五年中山王遣子姪入國學。以其國往來朝貢。

賜閩人三十六姓善操舟者。永樂以來國王嗣立皆請

命冊封。後惟中山王至。中山王世稱尚氏。

諭令二年一貢。每船百人多不過百五十人。貢道由福建閩縣。

貢物

馬

刀

金銀酒海

金銀粉匣

瑪瑙

象牙

螺殼

海巴

擢子扇

泥金扇

生紅銅

錫

生熟夏布

牛皮

降香

木香

速香

丁香

檀香

黃熟香

蘇木

烏木

胡椒

琉黃

磨刀石

右象牙等物進收。疏黃蘇木胡椒運送南京該庫。馬就於福建發缺馬羸站走遞磨刀石發福建官庫收貯。

安南國

祖訓安南國三年一貢。按安南古交趾地。洪武二年其國王陳日烓遣使朝貢請封。

詔封為安南國王。賜鍍金銀印誥命。未至而日烓卒。以封其弟日烓。後其臣陳叔明專國黎季犛

墓立俱降

詔詰責李聲詭言陳氏無後請署國事。已而日燈弟天平來訴。李聲又詭迎天平還國。伏兵殺之。永樂四年發兵討平。俘李聲父子。郡縣其地。尋有季擴之亂。甫定而黎利復叛。宣德間遣使謝罪請

命。因宥而封之。嗣後朝貢如常。別有進中宮

東官方物。其餘虔慰謝

恩無常期。

朝廷有大事則遣使頒

詔於其國國王請封亦遣使行禮嘉靖十九年其臣莫登庸篡立發兵討之明年登庸降

詔革王封止授都統使其所轄海陽等十三路各改設安撫司每司設安撫一員同知一員聽自行陞黜遇朝貢之年以陞黜過官員總數奏聞後登庸子莫福海嗣朝貢不常萬曆四年都統使莫茂洽遣使慶賀并補貢二次九年復來貢亦補二次貢道由廣西憑祥州

貢物

金銀器皿

犀角

象牙

白絹

薰衣香

降真香

沈香

速香

木香

黑線香

紙扇

真臘國

真臘本扶南屬國其國濱海後併有扶南。洪武四年其國巴山王忽尼驛遣使貢方物賀正。六年復來貢貢道由廣東後朝貢不常。

貢物

象牙

象牙

犀角

孔雀翎

寶石

土降香

蘇木

烏木

黃花木

胡椒

黃蠟

暹羅國

國濱海。本暹與羅斛二國。後併為一。洪武四年。其國王參烈照毘牙遣使奉金葉表來朝貢方。

物。賀正旦。六年。參烈寶毘牙復遣貢併獻其國地圖。十年遣人齎

詔及印往

賜之。十六年給文冊。永樂元年遣使乞量衡為國中式。自後定三年一朝貢。貢道由廣東。萬曆七年遣使具金葉表文入貢

貢物

象

象牙

犀角

孔雀尾

翠毛

龜筒

六足龜

寶石

珊瑚

金戒指

片腦

米腦

糠腦

腦油

腦漿

檀香

速香

安息香

黃熟香

降真香

羅斛香

乳香

樹香

木香

烏香

丁香

薔薇水

碗石

丁皮

阿魏

紫梗

藤竭

藤黃

硫黃

沒藥

烏爹泥

肉豆蔻

胡椒

白豆蔻

草菱

蘇木

烏木

大楓子

苾布

油紅布

白纏頭布

紅撒哈刺布

紅地紋節智布

紅杜花頭布

紅邊白暗花布

乍連花布

烏邊葱白暗花布

細棋子花布

織人象花文打布

西洋布

織花紅絲打布

織雜絲打布

紅花絲手巾

剪絨絲雜色紅花被面

織人象雜色紅花文絲縵

占城國

祖訓自占城以下

蘇門答刺西洋爪哇彭亨百花三佛齊淳泥

諸國來朝

時內帶行商多行謫詐。故沮之。自洪武八年。沮至洪武十二年。方乃得止。按占城國濱海。即古越裳林邑。洪武二年。其國王阿答阿者遣使朝貢。

詔封為占城國王。

賜鍍金銀印。四年。遣使奉金葉表朝貢。十六年。復遣子來賀。

聖節。乃齋與勘合文冊。二十四年。復來朝貢。以其臣弒立。

命絕之。永樂後。其國與諸國皆來朝貢。始定三年一

貢貢道由廣東正統後其國襲封遣使行禮

貢物

象

象牙

犀

犀角

孔雀

孔雀尾

橘皮抹身香

薰衣香

奇南香

金銀香

土降香

燒碎香

檀香

柏香

花藤香

熊腦

烏木

蘇木

花梨木

蕪蔓番沙

紅印花布

油紅綿布

白綿布

烏綿布

圓壁花布

花紅邊縵

雜色縵

番花手巾

番花手帕

兜羅綿被

洗白布泥

爪哇國

國濱海。即古閩婆。有東西二王。洪武五年其國

王昔里八達刺八刺蒲遣使奉金葉表貢方物
并納元所授宣勅十四年來貢如初有黑奴三
百人後絕其貢永樂二年其國東王孛今達哈
遣使朝貢請印

賜塗金銀印五年西王都馬板滅東王遣使謝罪
正統八年令三年一貢後朝貢無常

貢物

大雞

鸚鵡

孔雀

孔雀尾

翠毛

鶴頂

犀角

象牙

琥珀

龜筒

寶石

珍珠

薔薇露

奇南香

檀香

麻藤香

速香

降香

木香

乳香

黃熟香

安息香

烏香

龍腦

丁皮

沒藥

肉豆蔻

白豆蔻

藤竭

血竭

蘆薈

阿魏

大楓子

番木鱉子

華澄茄

菓炭

悶蟲藥

黃蠟

番紅土

烏爹泥

金剛子

碗石

錫

西洋鐵

摺鐵刀

鐵鎗

必布

油紅布

蘇木

烏木

胡椒

彭亨國

國濱海。洪武十一年。其王麻哈刺惹答饒遣使奉金葉表。貢番奴及方物。永樂十二年。復遣使朝貢。

貢物

金水罐

象牙

乳香

速香

檀香

片腦

胡椒

百花國

國居海中。洪武十一年。其王刺丁刺者望沙遣使奉金葉表朝貢。

貢物

白鹿

紅猴

龜筒

玳瑁

孔雀

鸚鵡

倒挂鳥

胡椒

香

蠟

三佛齊國

國居海中。即舊洪本南蠻別種。有地十五州。洪武初。其國王怛麻沙那阿者稱臣入貢。四年遣使奉金字表朝貢。六年遣賀正旦貢方物。八年復遣使從招。

諭拂菻國。十年其子麻那者巫里嗣立。奉表請封遣人齎駝鈕鍍金銀印賜之。

貢物

火雞

五色鸚鵡

孔雀

龜筒

黑熊

白獺

諸香

米腦

苾布

兜羅綿被

肉豆蔻

番油子

胡椒

淳泥國

國居海中。本屬閩婆。有地十四州。洪武四年。其國王馬合謨沙遣使以金表銀箋貢方物。永樂

三年遣使往封麻那惹加那乃為王給印
誥勅符勘合六年王率其妃及家屬陪臣來朝至
福建遣中官往宴勞之令所過諸郡設宴至京
王奉金字表獻珍物妃箋獻

中宮

東宮

上御奉天門賜王宴是年王卒於會同館輟朝三日
祭賻甚厚

詔謚恭順賜葬南京城外石子岡以西南夷人隸
籍中國者守之樹碑立祠

命有司春秋致祭。封其子遐旺嗣。遣中官及行人護
送歸國。復從其請。封其國後山為長寧鎮國之
山。

御製碑文賜之。十二年。及洪熙元年。俱來朝貢。

貢物

單目用銀

五色鸚鵡

倒挂鳥

孔雀

鶴頂

犀角

熊皮

生玳瑁

龜筒

寶石

珍珠

金戒指

金縹環

金銀八寶器

梅花龍腦

米腦

糖腦

降香

沈速香

檀香

丁香

肉豆蔻

黃蠟

螺殼

西洋白布

黑小廝

須文達那國

洪武十六年其國王殊旦麻勒兀達盼遣使奉

金葉表來貢

貢物

馬

幼苾布

隔著布

八的力布

花滿直地

番綿紬直地

兜羅綿

撒刺八

幼賴隔著

撒哈刺

薔薇水

降香

沈速香

蘇門答刺國

國濱海永樂三年其酋長宰奴里阿必丁遣使朝貢。

詔封為國王給印誥五年至宣德六年屢遣使來貢表用金葉十年復請封其子為王或曰即須文達那國

貢物

馬

犀牛

龍涎

寶石

瑪瑙

水晶

石青

回回青

錫

硫黃

番刀

弓

撒哈刺

梭眼

木香

丁香

降真香

沈速香

胡椒

蘇木

西洋瑣里國

國濱海。近瑣里視瑣里差大洪武三年其國王
別里提遣使奉金葉表貢方物。永樂元年復遣
使朝貢。

貢物

黃黑虎

馬

兜羅綿被

漫折的花被

皮剔布

槁泥布

沙馬打里布

瑣里國

西海中小國。洪武五年其國王卜納的遣使奉金葉表貢方物并圖其地山川以獻。

貢物

馬

紅八者藍布

紅撒哈刺

覬木里布

紅番布

白苾布

珠子項串

覽邦國

洪武九年國王昔里馬哈刺扎的刺扎遣使奉表來貢永樂宣德中附鄰國貢方物

貢物

馬

孔雀

胡椒

蘇木

檀降香

淡巴國

在西南海中。洪武十年國王佛喝思囉遣使奉表朝貢。

貢物

苾布

兜羅綿被

沈香

檀香

速香

胡椒

大明會典卷之一百五